

10 SEP 1998

Mahathir-Bomba

JABATAN BOMBA DAN PENYELAMAT DAPAT HELIKOPTER UNTUK UNIT UDARANYA

KUALA LUMPUR, 10 Sept (Bernama) -- Perdana Menteri Datuk Seri Dr Mahathir Mohamad hari ini menyaksikan penyerahan dua helikopter MI-17 1V Rusia yang akan digunakan oleh Unit Udara yang baru ditubuhkan oleh Jabatan Bomba dan Penyelamat.

Kedua-dua Helikopter itu diserahkan kepada Menteri Perumahan dan Kerajaan Tempatan Datuk Dr Ting Chew Peh oleh pengerusi dan presiden Airod Sdn Bhd Tan Sri Ahmad Johan di kompleks Airod di Subang dekat sini.

Dr Mahathir kemudian menamakan kedua-dua helikopter itu "Pekaka" dan "Enggang".

Dalam satu kenyataan, Airod berkata kontrak antara kerajaan dan Airod bagi membekalkan helikopter buatan Kazan itu dan peralatan mencegah kebakaran termasuk penyelenggaraan dipersetujui dalam masa yang singkat sebelum bermulanya Sukan Komanwel '98.

Kedua-dua helikopter itu akan dikendalikan oleh kru Tentera Udara Diraja Malaysia dan Jabatan Bomba dan Penyelamat untuk kerja-kerja mencari dan menyelamat.

Kenyataan itu berkata Perdana Menteri lah yang telah mencadangkan jabatan itu menggunakan helikopter dalam operasi memadam kebakaran dan menyelamat di bangunan-bangunan tinggi dan sebagai tindak balas segera dalam kejadian kebakaran hutan serta kecemasan dan bencana-bencana yang lain.

Sebagai program pembangunan jangka panjang, Airod akan mengendalikan peningkatan dalaman helikopter MI-17 1V itu dengan pemasangan peralatan seperti Sistem Doppler, Radar Cuaca, Sistem Pentempatan Global dan Forward Looking Infra Red dan sistem-sistem komunikasi dan navigasi yang lain.

MI-17 1V mempunyai keberatan berlepas maksimum 13,000 kg dan kelajuan pada kadar biasa 240 km/j (129 knot). Ia mempunyai kadar penerbangan 458 batu nautikal dan "payload" 4,000 kg pada keadaan "berlepas" yang biasa,

Keupayaan beban gantung maksimumnya ialah 5,000 kg.

Bercakap kepada pemberita kemudiannya, Dr Ting berkata sebanyak RM59 juta telah diperuntukkan untuk membeli kedua-dua helikopter itu dan segala peralatan yang perlu.

Katanya buat masa ini, helikopter itu akan digunakan untuk tujuan-tujuan terhad seperti untuk pengangkutan dan operasi menyelamat.

Katanya peralatan tambahan perlu dipasang untuk menyediakan helikopter itu untuk operasi memadam kebakaran.

"Ia akan siap dan boleh beroperasi sepenuhnya dalam masa enam bulan," katanya.

Menteri Pertahanan Datuk Seri Syed Hamid Albar yang juga hadir pada majlis itu berkata TUDM akan menyediakan kru untuk helikopter itu sehingga Jabatan Bomba dan Penyelamat melatih kakitangannya sendiri.

--BERNAMA

ES WAT